

# Nimogim Timote Leta

## Polimna Iriki Nimogim Timotem

## pilwa Leta

### Isipkita Yitkak

Onggityam Nimogim Timote Leta irika riga re Polte. I ton ama rika itemb leta yirikonj re Roma taun kena, re ton sibibmetind yibnonj. I ton yirikonj re ama rika A.D. siksti paib dide siksti seben (65-67) kemag gangga nat. I ija e wip ainy da Polind kea b'usaya yimind yusunato onggit kak ke re ton Naskanyam Timote Leta ake Tito Leta erikonj. I ton itemb ket nimogim leta yirikonj Timotem pilwa.

I onggit letand Pol ita ngai odede wumir yokateny da ita ti gangga yibnau opendam sibibmet ke dide momta e ton uj okas. Si onggit mop paemb ji ton itemb leta yirik Timotem pilwa. I Polim ma ina nena e singi da ton Timotend b'usaya yir ong aji ton kwa singi e Timotend ugowam nokip ton b'ogla Polimna misnari wiko siram b'irari kesa omnika iyeny dem tina uj kak ke.

Pol mogjog yit yitai Timotend re sosi wang iyo i gatab e dide ket nonony yomneny b'anyginena ouyaena riga wa pilke ewaikenam. I ket Pol danda kima Timotend il yongik nony b'i jawa oramitam iminjog gar ke utkunda mile b'auyaena wa pilind.

*Simesime Yitkak*

**1** Simesime! Kon Pol ten, i God naska nata kea singi yoramitonj kor pilwa Keriso Yesumna itmikitijog riga awowim. Si yu kon ita onggityam itmikitijog riga wīko omnika iyenyin riga wa pitapita omnena Tina tirir omni yirkokar gatab yit rinte re Keriso Yesum pilind yibim.

**2** Si kon onggityam leta yiriken re koina singi iyeni b'iga Timote, mor pilwa e. Abu Godim pilke dide mera Yonggyam Keriso Yesum pilke wurar i kear i dide ngimbla man kima.

### *Nony B'ijawa kima Wimenam B'ugowa Yit*

**3** I kon mor gatab siteket yit yomeneneyin Godind yena re kon yewangaeneyin kilkip kesa kukipind nonykok ke, odede rija na re kor b'uwarip yewangaeneno. Si it re kon ita bibir dide siwiny yir opmitena nekeneneyin, kon ipendi kesa men nonyik miyeneyin Godind siteket omnena.

**4** I kon ma sobijog singi e aena nekeneyin men yir ongongim. Mop nokip kon ita nonyik yiye-neyin moina yirekip kima yii gatab re men wetaweta awonda. Nokim da idenat kodaka sam ke yindangir taen dem ra men yir motngem dem.

**5** I kon ita nonyik b'amdeneyin onggitim da man gar okai kena iminjog gar ke utkunda mile yokatot. I itemb gar ke utkunda mile naska yibnonj re mor dad moleg Loisim pilnat, i daka ket mor mog Yunikem pilwa awonj. Si kon iminjog yimjasin da onggityam gar ke utkunda mile ita mor pilind yibim.

**6** Si onggit mop paemb kon men nonony motinyin, nokim da idenat God ma yiag wurar wul pila b'obogil dimildimil omnika iyenyit. I

intemb ji yiayg wurar mor pilind yibim rina re man yokatot re kon mor pilind yim aramkinond.

<sup>7</sup> Mop nokip God mera Yinayina Wingawinga nokainonj re ma mogam b'amnena mana, aji danda b'agona mana i singi b'iyena mile omnika mana i dide molenggyam b'agoka mile omnika mana.

<sup>8</sup> Si onggit paemb man goro ingar taenim mera Yonggyamim gatab b'ogil yirkokar bage yit pitapita omnennam. I kwa goro man ingar taenim kor gatab rinte re kon Yonggyam Keriso map sibibmetind nibnyin. Aji man b'ogla Godimna danda ke kon kima yipand gulgil b'idgotnena okatenyit God ma b'ogil yirkokar bage yit pitapita omnennam.

<sup>9</sup> I Godit mera yirkokar nokainonj dide ara nemokinonj yina mile yirkokarin wimenam. Si God onggityam mile yomnikonj re ma meraina omniiki b'ogil wiko mapena, aji Tinajog isamki singi mapena dide Tina wurar mapena rina re God yoramitonj Keriso Yesum pilind mera okawam, re Ton maka gowukoi yotobarkonj.

<sup>10</sup> Si mera yirkokar okawayam Keriso Yesu re kea pita awonj onggit gowukoi wa. Ingkenaemb ket Ton onggityam Godimna wurar pita wa yomnonj. Si ton ket ujimna danda yeomnenonj, i ket God ma b'ogil yirkokar bage yit kenaemb itkika kesa dadal ngirpu kesa yirkokar pita wa yomnonj mera okatam.

<sup>11</sup> Si onggit God ma b'ogil yirkokar bage yit map God ken nobagendonj pitapita omnena wiko rigam i itmikitijog rigam i dide ouyaena rigam.

<sup>12</sup> I ket onggit God ma b'ogil yirkokar bage

yit wīko ma paemb kon Yu odede b'īdgotnena yokatenyin it re sibibmetind nibnyin. Aji kon ma ita ingar yokatenyin, mop nokip kon wumir en Yesum ya pilnate re kon gar ke utkunda yoramitenyin, i kon danda kima yimjatenyin da Ton ririrjog e onggityam gasa owamam rina re Ton nony nijawonj omnikam, ngirpu onggit bibirind ride nat ra Keriso titenj dem.

<sup>13</sup> I man b'ogla wingata yit tamorkeneninyit imminena kesa iminjog yitkak rina re man utkundenot kor pilke. I man b'ogla wimena metkenyit gar ke utkunda milend dide singi b'iyena milend rinsi re Keriso Yesum pilind ebnya.

<sup>14</sup> Si man b'ogla Yinayina Wingawingam pilke danda okatenyit yete re mera pilind wimena yikeny, i ket onggit danda kaemb man ket b'obogil God ma b'ogil iminjog yitkak yirgong omnika iyenyit.

<sup>15</sup> I man onggit gatab wumir et da komresa riga yepiya re tuwonj Asiya eriya ke kor pilwa, ton kea ken kak niawo dide ket niraro. Si towa wingirind kea todaka Pigelo ake Ermogene kak niawonda.

<sup>16</sup> I Yonggyam toko ten kear ramnenin yepim re Onesiporomna metind wekeny. Mop nokip One-siporo kea ken jogjogpyam gar ngimblam omnika niyenenonj, i dide ton maka onggityam gatab ingar ke yokatenenonj rinte re kon sein kai ke ijebiki nibnyin sibibmetind.

<sup>17</sup> Aji re ket ton ikonj dikind Roma taun wa, ton ma sobijog na b'asowa yikenonj ken orakam ngirpu ton ket nodaronj.

<sup>18</sup> Si Yonggyam toko ti yenjikitau Ti pilke ukojog kear okatam onggit bibirind ra Ton titenj dem. I

man re wumirjog et rija na re Onesiporo komkesa  
gatab ke ken yir ipka niyenenonj Epeso taunind.

## 2

### *Yesu Kerisomna B'ogil Geja Riga*

<sup>1</sup> Si onggit paemb kor b'iga Timote, man b'ogla danda kima auka metkenyit Godimna wurar ke rinte re Keriso Yesum pilind yibim.

<sup>2</sup> I man koina opureni iminjog yitkak kea utkundenot jogjog yir ungata riga wa wipind. Si man b'ogla onggityam iminjog yitkak ninda nony ijaijog riga wa yim kumb wa taramisinyit itmaikenam yepim re ririrkipjog riga wekeny kwa ninda riga ouyaenam.

<sup>3</sup> I man b'ogla yipand kon kima mimkam ke b'idgotnena takateninyit odede it re Keriso Yesumna b'ogil nony ijai geja riga re dide.

<sup>4</sup> I makwa yipa geja rigat ita b'anomka ikeny ninda tinajog singi wiko omnikam, aji ton b'ogla tina mopyamimna b'ingawand b'atkaeneny yet re tin ara yemokonj tina geja riga awowim. Nokim da idenat ton tin samim omnikeneny.

<sup>5</sup> I kwa daka ra yipa b'ikok rigat naskajog b'itkeny, aji ra maka yimta undok b'ikenam b'ingawa yit, si ton ma ita b'ogil dira okas rinte ra naskajog b'ikok rigat okas.

<sup>6</sup> I wala riga yete re ingki wikkond b'asowa yikeny tina yonggyamimna b'ingawa yit ririrind, ton b'ogla naska onggit ingki ke owou yingg rakasin ti yonggyamim pilke.

<sup>7</sup> Si man b'ogla odede yitkak gatab nony mena-mena omnika eyenine rinsim re kon apureninyin,

mop nokip Yonggyam ita men wumir omnena mitiyeny onggityam komkesa yit gatab.

<sup>8</sup> I man nonyik b'amdene Yesu Kerisom gatab yet re uj ke utnyitonj, it re Dawidim pilke b'usmureni b'iga. Si kon intemb Ti gatab God ma b'ogil yirkokar bage yit pitapita omnena yiyenyin.

<sup>9</sup> Si onggit mop paemb kon b'idgotnena yokatenyin, ngirpu yu kon sein kai ke ijobiki nibnyin odede wip it re raskol riga re dide. Ajie temb God ma yit re makwa ita ijobiki yibim.

<sup>10</sup> Si onggit mop paemb kon odede b'idgotnena wingirind mimkam ke wimena nekenyin re towanim b'ogil mapae yena re God abagikinonj yirkokar okawam. Nokim da idenat todaka onggityam yirkokar undokasi okatam rinte re dadal ngirpu kesa b'ogil inyomarena kima yibim Keriso Yesum pilind.

<sup>11</sup> Si ite re ji yitkak re iminjog nony ijawa kima e da,

“I rada men kea Ton kima yipand uj aukitondam,  
si men kwa opima Ton kima yipand wimena tuwenyin dem.

<sup>12</sup> I rada men opima b'idgotnena wingirind mimkam wimena wuwenyin Ti map,  
si men opima Ton kima yipand wip omnena riga tainindam dem.

I rada men ita Tin oena iyenu,  
si todaka opima men oena nitiyeniny dem.

<sup>13</sup> I nangga ma ji rada men ma nony b'ijawa kima riga im wekenyin,  
ajie Ton ita winind nony b'ijawa kima e wimena yikeny.

Mop nokip Ton re nony b'ijawa riga e dide Ton ma  
ririr e Tilenggyam oenam onggityam Tina  
nony b'ijawa mile.”

### *Godimna İmjati Wiko Riga*

**14** I man b'osla komkesa riga tamneninyit onggityam gasa gatab nonyik omdenam. Si man kupkakupka danda kima ten tengaeninyit Godim wipind da, “Win erarkinam odede korirkorir yit b'ugwatena mile ringkaim re maka rigap b'ogil akatenanj aji onggityam milepim riga negir amnikenenanj yepim re utkundenenanj.”

**15** I man b'obogil b'asowa mekene God ma iminjog yitkak dimdim ikalnenam, i ingkaemb man Godimna imjati riga taet, i dide ket odede wiko riga taet yet ra maka ingar tainy tina wiko gatab.

**16** Aji man b'osla ewaikene odede kip kesa Godind nony iyena kesa yit b'usenena riga wa pilke. Mop nokip odede rigap riga wip amnenanj re Godind ewangaya kesa kilkil mile oikindena mim.

**17** Si towaina opurena re odede kopa pila e rinte ra garind warabag tawik itkikam. Itowa wingirind osiya ji riga ebnya Imenayo ake Pileto.

**18** Si osiemb riga nimog re Godimna iminjog yitkak esungaijog i ebnya. Si ton ija imemb ji opurena eyeninya da utnyita mile re kea naska nata aukonj, si ma ita wari tawik. Si ton odede yit kaimemb ninda gar ke utkunda rigaina gar ke utkunda mile negir omnika eyeninya.

**19** Aji sosi re kea Godimna ispiki danda kima imnineni kesa met orangapu pipmet kumb nate

yibim dide kwa onggit yit ke iminjog imjati e yibim da, "Yonggyam wumir e yepim re Tina riga" dide "Komkesa riga yepim re Yonggyamind nyi yuwaterenyi towa Yonggyamim, ton b'ogla rewaikeninem komkesa negirjog mile wa pilke."

**20** I jogiog gasa kima rigaina ukoi metind opima de gold ke dide silba ke omniki ingaena gasa. Aji ma odede ukoi wulkip kima gasa nena im wekeny aji daka wul ke dide pam ke omniki gasa toda opima wekeny. Si onggityam gasa wingirind ninda re isnawa kima b'obogil ingaena mim aji ninda re isnawa kesa jabajaba ingaena mim wekeny.

**21** Si onggit paemb yet ra tilenggyam kilkip kesa tainy onggityam komkesa negirjog mile wa pilke, si ton ita isnawa kima ingaena gasa pila tainy. Mop nokip ton kea yina ai e yibim dide ton re kea b'ogiljog riga e ainy Yonggyamim ingaenam, i dide ton kea b'angonjeni e yibim komkesa b'ogil wiko omnikam.

**22** Si man b'ogla b'ikene sisil rigaina gowukoi git ke singi mile wa pilke. Aji man b'ogla odede riga kima yipand sam kima wimena metkenyit yepim re Yonggyamind nyi yuwaterenyi kilkip kesa gar ke, i ket man egaregar riga na mitibnyit odede mile okatenam, opi re negir kesa dimdimjog mile, i gar ke utkunda mile, i singi b'iyena mile i dide ngimbla mile.

**23** I kwa man b'ogla bond tepeneninyit korirkorir dide multekip kesa yit b'ugwatena mile. Mop nokip man wumir et da ita ingkek ukojog soro kima yit b'ugwatena pita tainy.

**24** I Yonggyamimna wiko rigam re ma ririrkipjog e soro kima yit b'ugwatena mile omnikam. Aji

ton b'ogla komkesa riga wa pilwa musik isnawa nony kima mile ke tamnikeneniny, i riga b'obogil ouyaena teyeniny i dide ket ton b'ogla negirjog mile wingirind mimkam wiimena ikeny.

<sup>25</sup> I ton b'ogla nony kima musik wiimena mile ke odede riga yimak itaya teyeniny yepim re owinkanj ti pilind geja omnikam. Si ra ton yimak itaya teyeniny, ton b'ogla odede nony kima da rika God opima towaina gar tengenjiny iminjog yitkak wumir aukam.

<sup>26</sup> I ingkaimemb ton ket b'obogil nony tepangkanj Satanamna disim pilke itringendam. Nokip re ton Satanamna dis borand okati wekenonj, ton mile amnikenento re tina singi ririr nat.

### 3

#### *Kikitum Winind Godind Ewangaya kesa Mile*

<sup>1</sup> I man b'ogla onggit gatabim wumir yokate da kikitum winind opima mogga kima bebiq win pita taukanj dem.

<sup>2</sup> Si ra opimemb win pita taukanj dem, odede riga im taukanj dem, opi re towalenggyam nena singi b'iyena riga, i wulkip singi iyena riga, i b'asourena riga, i towalenggyam pumb wa b'urowatena riga, i b'isadrena riga, i b'u ake mog-war utkunda kesa riga, i siteket b'amnena kesa riga, i yina b'amnena kesa riga,

<sup>3</sup> i kear kesa riga, i ninda rigaina negir mile gatab kear kesa riga, i ninda riga wanim negir yit opurena riga, i towalenggyam b'agoka mile kesa riga, i wip inggrawa kesa mile riga, i b'ogil mile singi kesa omnena riga,

**4** i towaina riga tib iyena riga, i isanikesa korirkorir mile omnika riga, i b'asourena mile ke ukoi b'amnena riga, i dide gowukoi sam okatenam ukoi singi b'iyena riga, aji ma Godind singi iyena riga im.

**5** I kwa ton opima gim ke Godind ewangaya mile nena omnika eyenanj, aji towaina gar ke re ita Godimna danda yoenenyi rinte re Godind ewangaya milem pilke pita aena yikeny. Si man b'ogla odede riga wa pilke ewaikene.

**6** I towa wingirind ninda b'anyginena ouyaena rigap rigaina met nata b'igarena wuweny, dide ket ton gar bodakak kongga nony ejomka eyenanj yepim re negir mile angurka eyenanj dide kwa jogjog b'engabenga gim ke singip ten wiþ eyenanj.

**7** Si odede konggap ita winind opima b'auyaena wuweny sisil ouyaena gatab, aji ton makwa ririr im aenanj iminjog God ma yitkak wumir aukam.

**8** I naskand b'ilä osiemb riga Yane ake Yambre Mosem pilwa gejam onyitonda. Si opimemb b'anyginena ouyaena riga todaka odede yipa wiþ nya kaim gejam owinkí wekeny God ma iminjog yitkakim pilwa. I opimemb riga towaina nonykok re negirjog itkiki im wekeny dide towaina gar ke utkunda mile re makwa yipa ririrkipjog im God ma iminjog yitkak kima.

**9** Aji ton ma ririr im onggityam mile omnikand pinjog tekeny. Mop nokip towaina wumir kesa korirkorir mile ra opima komkesa riga wa wiþind pitand taukanj odede wiþ rija na re aukonj Yane ake Yambré wa pilind.

**10** Aji re man ken yimta undoka niyenot, man kea odede komkesa kor gatab mile yir ongong eyeninot, opi re nangga na kon ouyaena eyeninond, i ridede na kon yirkokar wimena nekenond, i nangga mop kima na kon wimena nekenond, i kon ridede na gar ke utkunda milend nekenond, i ridede na kon musik wimena nekenond, i kon ridede na singi b'iyena milend nekenond, i kon ridede na mimkam wimena milend nekenond,

**11** i ridede na kon ji ke negir kima b'idgotnena akateninond, i ridede na kon b'idgotnena akateninond, i nangga na kor pilind aukenento de Antiyok taunind i Ikoniyon taunind i dide Listra taunind, i dide ridede na kon ji ke negir kima b'idgotnena wingirind mimkam wimena nekenond. Aji man wumir et ridede na Yonggyam kea ken nitringendenenonj onggityam komkesa bebig wa pilke.

**12** Si ra komkesa riga yepim re Keriso Yesund gar ke utkunda ke yokatenyi ton singi taenanj iminjog Godind ewangaya milend wimenam, ton opima negir kima b'idgotnena okatena teyenanj.

**13** Aji negirjog mile riga dide b'anyginena ijongki nya ke rabem b'amnena riga, ton opima negir mile oikindena eyenanj de negirjog mile wa. Mop nokip ton opima riga b'anyginena ijongki nya ke rabem omnena eyenanj dide daka ton odede yipa wip nya kaim towalenggyam rabem b'amnena wuweny.

**14** Aji man b'ogla onggityam yitkak wa pilind wimena mekene rina re man b'auyaenot dide ket man gar ke utkunda ke imjatena eyeninot. Mop nokip man towanim wumir et yepiya re men

mouyaeneno.

<sup>15</sup> I kwa man yina peba yitkak wumir auka metkot re b'iga sobijog kena. Si onggit yina peba yitkakip ririr im mor yirkokar okatam b'ogil multekip motkai gar ke utkunda mile ke rinte re man yoramitenyit Keriso Yesum pilind.

<sup>16</sup> I kupka yina peba yitkak re Godimna b'imuri kima im, si ton ririrkipjog im odede milend ingaenam, opi re riga ouyaenam, i negir mile gatab imjati kima samany iyowam, i kaokao mile riga dimdim omnikam, i dide yimak yit omnennam negir kesa dimdimjog milend wiemenam.

<sup>17</sup> Nokim da idenat odede riga ririrkipjog God ma riga taukanj dide ton ket ririrkipjog tekeny komkesa b'ogil wiko omnikam rinsim re God singi eyeniny omnikam.

## 4

<sup>1</sup> I kon kupkakupka danda kima men mitngaen Godim wipind dide Keriso Yesum wipind yet ra yilo riga dide uj riga isagika teyeniny dem. I kwa ra Keriso Yesu pita tainy dem, Tina pumb tungg ita ik dem. Si onggit paemb kon odede danda kima mitngaen.

<sup>2</sup> Si man b'ogla God ma yitkak pitapita omnena iyiyene, dide ket man ita winind onggityam moina gatab wikkond kinyir aena mekene, b'ogil winind dide negir winind. I kwa man b'ogla komkesa gatab ke musik wiemena kima riga ouyaena teyeninyit, i ingkaemb ket man negir mile gatab imjati kima riga dimdim omnika teyeninyit, i samany iyowa teyeninyit, i dide ugowa teyeninyit.

**3** Mop nokip ra wîn ik, rîgap ma opima takatenanj dem God ma iminjog dimdim ouyaena yitkak, aji ton towaina singi ririr nasim ouyaena yitkak nena takatenanj. Si ton opima odede jogjog ouyaena rîga imda teyenanj yepiya ra ten tauyeananj dem nangga mim ra ton singi taenanj utkundenam.

**4** I kwa ton opima yipya idoka teyenanj dem God ma iminjog yitkak utkundenam, aji ton yipya b'itkena tuweny dem kip kesa kakyit utkundena mim.

**5** Aji man komkesa gasa gatabim b'obogil nony ipangki na mitibnyit, i negir kima b'idgotnena takateninyit, i God ma b'ogil yirkokar bage yit pitapita omnena wiko omnika iyenyit, i dide moina wiko ririrkipjog omnika teyeninyit rina re God mokainonj omnikam.

**6** Mop nokip kon Godim wîkond b'ingaenenond i ket koina yirkokar re kea b'undwatapu wa e ainy odede ringma ra si rigat ik igmarik tina si mile undwatam. Si kor kemb ite ke wîn nitkau onggityam gowukoi iraram.

**7** I kon kea bebig wingirind b'ajobrena nekenenond God ma wîkond odede ringma ra b'ipowa wiband rigat b'ajobrena kima b'ipowa ikeny, aji kor kemb ite ke dikind seg ainy. I koina yirkokar b'ikok re kemb ite ke dikind undwatapu wa ainy. I dide kwa kon gar ke utkunda mile kea danda kima emorka iyimin ngirpu yu.

**8** Aji inte kornim wip ke komb gasa yibim okatam, it re negir kesa dimdimjog b'ogil dira. Si negir kesa dimdimjog b'isagika rîga, Yonggyamit ita onggityam dira kor notkau onggit bibirind ra

Ton ik dem. Aji Ton ma kornim nena ma notkau dem, aji daka kwa komkesa towanim ma yepim re singi iyena kima yir yungai Tina openda gatab.

*Pol Tinajog Gasa gatab Yit*

<sup>9</sup> I man danda ondrasit wanakana kor pilwa menonim.

<sup>10</sup> Mop nokip Dema kea niraronj dide yikonj Tesalonika taun wa, nokip ton singi eyeninonj re onggityam gowukoi gasa na. I Kreske kea daka yikonj Galatiya eriya wa, i dide Tito daka kwa yikonj Dalmatiya eriya wa.

<sup>11</sup> Si Luk nenate kon kima yibim. I man Makind iyit dem kor pilwa man kima ra man metket dem. Mop nokip ton re kornim b'ogil yim b'akawa riga e tainy koina wiko omnikam.

<sup>12</sup> Ikon kea Tikikond yitmikitond Epeso taun wa.

<sup>13</sup> Si ra man metket dem, man b'ogla koina tumind pinpın kobırgim iyit rina re kon yiraronj Karpomna metind de Trowa taunind. I kwa man teyinyit dem ninda koina peba aji ukojog re b'angga gim ke omni ki peba na.

<sup>14</sup> I Aleksandro yete re ayin ke gasa omnika riga yibim, ton re ma sobijog na negirjog mile kor nomnikenenawainonj, si Yonggyam toko ti mira yetendau tina omni ki mile ririrind.

<sup>15</sup> Si madaka tinim yir kima mitibnyit. Mop nokip ton ma sobijog danda kima na gejam onyitonj meraina ouyaena yitkak gatabim.

<sup>16</sup> I re kon naskajog b'isagikapu pipmet wa onyitond kor gatab b'irmekam dikind Roma taunind, makwa yipa riga kor tab ke awonj irmeka yit opurenam. Aji komkesa rigap re kea ken nirareno.

Aji kon singi en da God goro towa ragenau onggityam towaina negir gatab.

**17** Aji Yonggyam kea dikind kor tab ke onyitonj dide ket kor danda nokaenonj. Nokim da idenat Yonggyam ken nitngaeny kupkakupka God ma b'ogil yirkokar bage yit ririrkipjog pitapita omnenam, i ingkaemb ket komkesa yitam b'engabenga rigap onggityam yitkak tutkundenanj. I ket Yonggyam kea ken nitringendonj ujim pilke.\*

**18** Si Yonggyam ita ken itringindena nitiyen komkesa negirjog mile wa pilke dide Ton ket ita b'obogil nii dem Tina pumb tungg wa de pumb wa. Si b'ogil inyomarena Ti pilwa dadal ngirpu kesa ngirpu kesa, iminjog.

### *Undwatapu Yitkak*

**19** I man widaemb yit tamninyit Priskila ake Akwila dide towa pilwa yepim re wekeny Onesiporomna metind.

**20** I Erasto ama yibim de Korinto taun wa, i kon Tropimond yirarond Mileto taunind nokip ton kopa na yokatonj.

**21** Si man danda ondrasit wanakana menonim dikind, yimta kena gibil win ik dem. I Yubulo i Pude i Lino i Klaudiya i dide komkesa gar ke utkunda nany dide yingganwar men madaemb yit momnenyi.

**22** Si Yonggyam toko moina wingawinga kima yebim. God ma wurar komkesa win kima.

---

\* **4:17:** Grik peband da “laiyonimna tu bora ke”. Nokip onggit winind ninda sibibmet riga wibapu wa aramkenento laiyon kima b'ipowam ngirpu ra laiyonip ten tangranj.

**Wipi Yit God ma Yina Sisil Yina Peba  
The New Testament in the Wipi Language of Papua  
New Guinea  
Nupela Testamen long tokples Wipi long Niugini**

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

---

PDF generated using Haiola and XeLaTeX on 28 Dec 2024 from source files  
dated 31 Aug 2023

a5a5213a-fb12-52b5-9c99-efb8044c6646